



... E ghè xe anca chi sta pezo!

Propio in sti tenpi, no xe permesso èssare curti de vista; no basta pi vardare solo la nostra situazion, bisogna pensare che pol èssarghe chi sta pezo de noantri

Ormai no se pole pi dire "Mi no savéa": le ocasion par farse na idea de come va le robe te 'l mondo le xe tante: la television, i giornài, i discorsi dal barbiere, quello che ne conta qualchedun che se xe 'lontanà da casa e ga visto co i so oci de le robe che no 'l pensava che le fusse cussi brute...

Sta volta la ne xe capità propio a noantri de fare on picolo viajo fora del Veneto, dove no se gavarà dito che la se fusse fata cussi critica.

Insieme con Luigi Frosi e i amissi del Coro La Valle de Padova, ghemo partecipà al 28° Festivalul International de Muzică Corală a Pitești, ne la Curtea d'Argeș, in Romania, invità dal Coro romeno "D.G. Kiriac".

El programa de i vari concerti, che ne ga fato traversare in longo e in largo el teritorio romeno, n'ha fato védare loghi, incontrare persone, parlare e cantare par i "Belunesi e i Veronesi nel Mondo" de Câmpulung, ma soratuto spalancare i oci, restare colpìi da imàgini de miseria nera che parla chiaro su le condizion de vita de sta gente, costreta a fare i conti, da na parte



I oci tristi de ste putine... i parla da soli.



El Coro La Valle, davanti al Municipio de Câmpulung Muscel.

co la situazion che xe saltà fora dopo tanti ani passà soto on regime totalitario, e da st'altra co la crisi in corso che ga fato el resto. Par farse on'idea: le paghe xe stà scurzà del 25%; on professore el ciapa el corrispondente de 250 euro; l'afito costa su i 200-250 euro; in agricoltura on salarià el laora 8 ore e el ciapa 10 euro so na giornata.

La tera da coltivare la sarìa tanta, el laoro no 'l mancaria, ma no ghe xe i schei par pagarlo. E 'lora chi ga corajo el parte, el va in Spagna o in Italia a fare laori che i altri no vole pi fare.

Chi resta a casa, varda senpre in alto, anca parché la xe gente religiosa, e la spera che riva i schei da l'èstero. Ghemo visto le robe che da noantri le ghe jera in tempo de guera. Casete de la misericordia, tute in fila drio la strada come tanti poareti che speta el passajo de qualche turista: do camarete e on desbrigo, co ratatuje de ogni gènere, qualche galina, on fiore, tanti cani; pi de la metà le xe sarà, bandonà, dirocà, come on vecio senza pi nissun che ghe va drio.

Có riva sera e a la festa, te vedi ste creature, veci co putini, sentà

so na piera davanti casa: e i speta... e i speta... Ghemo parlà con Veneti de seconda generazion, emigrà in Romania te 'l dopoguerra. I xe delusi, i se sente desmentegà da la nostra Region Veneto, inpegnà in altre direzion.

Ghemo tentà de dirghe, visto che i parlava dialeto belunese, che in sto momento la xe dura par tuti, ma in cuor nostro, dopo quello che ghemo visto, gèrimo e semo convinti che lori i sta tanto pezo.

Ghemo promesso de contarlo in giro. E cussi ghemo fato!



Una de le tante casete vode...